

**LINANGKOB NGA HISGOTANAN:
ANG DIOSNONG PAGPAAMBIT SA DIOSNONG TRINIDAD
ALANG SA DIOSNONG PAMATIGAYON**

Mensahe 2

**Magsinati sa Diosnong Pagpaambit sa Diosnong Trinidad
sa Pagkinabuhi diha sa Diosnong Paghinigugmaay**

Basahong Kasulatan: Efe. 3:14-19; A. A. 1:2-3; 3:6; 4:7, 15; 6:4; 8:6-7; Bug. 19:7; 21:2

- I. Sugilanon sa gugma ang Biblia, sa labing putli ug labing balaang kahulogan niini, sa unibersohanong magtiayon—sa Dios diha ni Cristo nga Pamanhonon ug sa tinubos nga katawhan sa Dios nga pangasaw-onon—Juan 3:29; Mat. 25:6; Bug. 19:7; 21:2; 22:17:**
- A. Sa tanang siglo, nahigugma ang Dios sa tawo; gilalang Niya ang tawo sa tuyo nga makabaton Siyag kapikas—v. 17.
 - B. Maghihigugma ang Dios, ug gilalang Niya ang tawo sa dagway Niya nga maghihigugma; nagpasabot kini nga gilalang Niya ang tawo aron mahigugma Niya ang tawo—Mar. 12:30; Efe. 3:14-19.
 - C. Diosnong sugilanon sa gugma ang tibuok Biblia, ug pinamubong porma ning sugilanona ang Awit sa Mga Awit—1:2-3; 8:14:
 - 1. Romantikong basahon ang Biblia, ug maglabi gyod unta karomantiko ang relasyon nato sa Ginoo—A. A. 4:7.
 - 2. Kon walay paghinigugmaay tali nato ug ni Ginoong Jesus, nan, relihiyosong mga Cristohanon ta, dili romantikong mga Cristohanon—1:2-3.
 - 3. Sa kinatibuk-an, pulong sa diosnong pagpangulitawo ang Biblia; makita nato sa Biblia nga gitinguha sa Dios ang atong gugma—2 Cor. 11:2.
 - D. Kon buot natong kuptan ang nangulitawong pulong sa Dios, nagkinahanglan tag dali motubag, mabinationong paghigugma Kaniya; kining dali motubag, mabinationong paghigugma gipakita sa Awit sa Mga Awit, nga niini dunay hulagway sa paghigugmaay sa Hinigugma ug sa Iyang gihigugma—1:2-4; 2 Cor. 5:14-15; Juan 14:21, 23:
 - 1. Ang gihisgotan sa Awit sa Mga Awit mao ang kasaysayan sa gugma sa maayo kaayong kaminyoon, nga nagpadayag sa nagkauswag nga pagsinati sa mahigugmaong pakig-ambitay sa tinagsang magtutuo kang Cristo—1:2.
 - 2. Kahibulongan ug tin-aw kaayong hulagway ang Awit sa Mga Awit, nga balaknog porma, sa gugma sa kasal tali ni Cristo nga Pamanhonon ug sa Iyang mga maghihigugma nga pangasaw-onon Niya—2:4; 6:3; 7:11-12; 8:5-6, 14.
- II. Makita nato sa Awit sa Mga Awit ang relasyon tali sa pagsinati sa diosnong pagpaambit ug sa pagkinabuhi diha sa diosnong paghinigugmaay:**
- A. Kon tinuod gyod tang nahigugma sa Ginoo, motubo ug matransporma gyod ta sa kinabuhi—2 Cor. 5:14-15; 3:18.
 - B. Kay nahigugma man pag-ayo sa iyang hinigugma ang matinguhaon sa Awit sa Mga Awit, nasinati niya ang diosnong pagpaambit, ug dunay mapadayonong kausaban sa pagtubo niya sa kinabuhi—1:2-3, 4b, 9, 12, 15; 2:2, 14; 3:6-7; 4:7, 12-15; 6:4, 10, 13a.
 - C. Bisan unsay gihigugma sa tawo, natumong ug naokupahan ug napanag-iyang niini ang tibuok niyang kasingkasing, bisan ngani ang tibuok niyang pagkatawo—1 Tim. 6:10-11; 2 Tim. 3:2-4; 4:8, 10a; Tito 1:8:

1. “Nagpasabot ang paghigugma sa Dios nga bug-os natong gipatumong Kaniya ang tibuok natong pagkatawo—espíritu, kalag, ug lawas, lakip na ang kasingkasing, kalag, hunahuna, ug kusog (Mar. 12:30)—sa ato pa, paokupahan Niya ug mawala diha Niya ang tibuok natong pagkatawo, aron mahimo Siyang tanan nato ug praktikal tang mausa Niya sa inadlaw natong kinabuhi” (nota 3 sa 1 Cor. 2:9).
2. Ang mahigugma ni Ginoong Jesus kana mang magtamod Niya, magpatumong sa atong pagkatawo Kaniya, mobukas Kaniya, magpahimulos Niya, magpauna Niya, mausa Niya, magkinabuhi Niya, ug mahimong Siya—Mat. 26:6-13; 2 Cor. 3:16; Mar. 12:30; Col. 1:18; 1 Cor. 6:17; Fil. 1:20-21; *Mga Alawiton*, #477, estansa 2.

III. Nagtimaan ang Tirsa ug Jerusalem sa balaang puluy-anan sa Dios, sa puluy-anan sa Dios, nga gilibotan sa balaang syudad sa Dios nga nahimong panalipod niini—A. A. 6:4a:

- A. Mausa ngani sa Dios ang maghihigugma ni Cristo aron mahimong puluy-anan sa Dios, sa panan-aw sa Dios maanyag siya sama sa Tirsa ug matahom sama sa Jerusalem.
- B. Tungod sa pagkinabuhi niya diha sa pagkayab ni Cristo diha sa pagkabanhaw, nahamtong ang maghihigugma ni Cristo diha sa kadato sa kinabuhi ni Cristo mao nga nahimo siyang balay sa Dios, ang balaang puluy-anan sa Dios ug ang panalipod niini—itandi sa Gen. 2:8-12, 18-24; 1 Cor. 3:9-12.
- C. Nagpuyo ang maghihigugma ni Cristo sa Dapit Labing Balaan, sa sulod nga lawak sa langitnong balaang puluy-anan, sulod sa tabil, nagsinati sa pagkayab ni Cristo pinaagi sa krus human siya makasinati sa Iyang pagkabanhaw—A. A. 4:8.
- D. Sa paghigugma nato sa Ginoo sa labing maayong gugma, matagik ta sa Tulusang Dios aron mahimong puluy-anan Niya—Bug. 2:4; Juan 14:20-21, 23; Efe. 3:17:
 1. Kining gugma sa Dios maoy nagpapangandoy Niya nga mausa, masagol, ug matagik kanato, ug kining mao rang gugma sa sulod nato ang nagpapangandoy nato nga mausa, masagol, ug matagik Kaniya—1 Juan 4:19, 8, 16.
 2. Sa paghigugma nato sa Ginoo sa labing maayong gugma ug sa pag-ambit nato sa tanang aspeto sa diosnong paghinigugmaay, mahimo tang Bag-ong Jerusalem, nga mao ang nidako nga Dapit Labing Balaan—A. A. 1:2-3; 2:14; 4:8; 6:4; Bug. 21:9-10.
- E. Ang mahimong balaang puluy-anan sa Dios kana mang matukod (may kala-botan sa pagtukod sa Lawas ni Cristo) diha sa pagtubo sa kinabuhi ni Cristo ug sa dili matugkad nga kadato niini hangtod mahamtong—Efe. 4:12-16:
 1. Sa Daang Tugon gihulagwayan sa Tirsa ug sa Jerusalem ang balay sa Dios; sa Bag-ong Tugon kini ang organicong Lawas ni Cristo—Efe. 4:16.
 2. Organico ang pagtukod sa Lawas ug nag-agad sa pagtubo ug pagkahamtong nato sa kinabuhi—v. 15.
 3. Sa kinataposan, kining pagtukod sa organicong Lawas ni Cristo, nga mao sab ang asawa ni Cristo (5:25-32), mahingpit sa Bag-ong Jerusalem, sa balaang syudad nga kahingpitan sa Dapit Labing Balaan, nga masigka-puluy-anan sa Dios ug sa mga tinubos Niya sa eternidad—Bug. 21:2-3, 16, 22.

IV. Sa pagkahamtong sa kinabuhi ni Cristo, nahimong Shulamitanhon ang maghihigugma ni Cristo, nga nagtimaan nga nahimo na siyang hulad ug kopya ni Cristo nga mahiangay Niya aron magminyo sila—A. A. 6:13:

- A. Balikbalik tang gisultian sa Biblia nga tuyo sa Dios nga mausa Siya nato ug mausa ta Niya—sama sa kinabuhi ug kinaiya apan dili sa ranggo sa pagka-Dios—Bug. 21:2; 22:17.
- B. Maghunahuna ngani ta unsaon nga modangat ta sa habog nga punto sa diosnong pinadayag—sa pagkahimong tawo sa Dios aron himoong Dios ang tawo sa kinabuhi ug kinaiya—dili gyod ta mosalig sa atong kaugalingon kondili sa Ginoo nga gugma, gahom, ug kaluoy nga maghimo natong mga sudlanan sa kaluoy, kadunganan, ug himaya—A. A. 8:5-6.